

الغريبه...!!

نداهه ندهتتى من مكان بعيد
بصوتها اكدت لى رزقى عندها هيزيد
فردت الجناح وطرت بقلب سعيد
اول ما قابلتتى مسكتنى بيد حديد
لقيت الغريبه ايامها صعبه مجنونه
يادوب نومه وقومه بقيت جوه طاحونه
لاقريب لاصاحب يمد يده بمعونه
لانوم لاراحه اصل الشغلانه مسكونه
لاحريه لا سياحه خطوتك فيها مكنونه
لاعفو لاسماحه غلظة العمل مضمونه
والسعاده تطلقها كبرى وبينونه
للغير توهبها وانت زى الليمونه
شراب بارد للغير وتتعصر بسخونه

اول ماترجع يتفرد الدراع سلامات
وكله حواليك زى السباع يقولك هات
مفكروش فى الصحه اللي شوهتها الآهات
مفكروش فى الصحبه اللي اتنست فى سكات
ولا كام مريض عاد مليون عاهات
ولا كام شهيد فى الصندوق لبلده عاد
ولا الشباب اللي راح لجل شوية دولارات
وفى يوم وانا قاعد..
مع اولادى قعده حنونه
سألونى سؤال اجابته جوايا مدفونه
لو غاب الاب ممكن تتوجد السكينه
لما يغيب عننا .قولنا مين يربينا..؟
صحيت جوايا الآجابه
آبوها غربه ملعونه..!!